

**"JU UNIVERZITET U ZENICI"  
OJ STUDENTSKI CENTAR ZENICA**

**P R A V I L N I K  
O UNUTRAŠNJEM ŽIVOTU, RADU I ODGOVORNOSTI  
STUDENATA U OJ STUDENTSKI CENTAR ZENICA**

**Zenica, maja 2007.godine**

Na osnovu člana 246 tačke 1 Pravila "JU UNIVERZITET U ZENICI", Upravni odbor je na svojoj \_\_\_\_\_ sjednici održanoj dana \_\_\_\_\_ god. donio

## **P R A V I L N I K O UNUTRAŠNJEM ŽIVOTU, RADU I ODGOVORNOSTI STUDENATA U OJ STUDENTSKI CENTAR ZENICA**

### **OPŠTE ODREDBE**

#### **Član 1**

*Ovim Pravilnikom utvrđuju se prava, dužnosti i odgovornosti korisnika usluga (studenata – stanara OJ Studentskog centra), zaposlenika raspoređenih na radu u OJ Studentski centar Zenica i organa upravljanja studenata i zaposlenika u upotrebi, čuvanju, održavanju reda i higijene stambenog prostora, zajedničkih prostorija i uređaja u OJ Studentski centar Zenica (u daljem tekstu: Centar).*

#### **Član 2**

*OJ Studentski centar Zenica pruža studentima usluge smještaja i ishrane i druge usluge u skladu sa Pravilima i Pravilnicima "JU UNIVERZITET U ZENICI" (u daljem tekstu: Univerzitet). Centar može na osnovu odluke Upravnog odbora Univerziteta pružati usluge iz predhodnog stava i drugim korisnicima, ako se time ne ometa ostvarivanje osnovnih zadataka Centra.*

#### **Član 3**

*Korisnici usluga u smislu ovog Pravilnika smatraju se studenti koji su u skladu sa Pravilima i Pravilnicima Univerziteta stekli pravo da stanuju u Centru ili da koriste i druge usluge, odnosno da ostvaruju prava i dužnosti u Centru.*

*Prava i dužnosti utvrđene ovim Pravilnikom, studenti stiču na osnovu Ugovora zaključenog sa Centrom, a efektivno ih počinju koristiti useljnjem u Centar, odnosno otpočinje korištenje drugih usluga koje im pripadaju po aktima Univerziteta.*

#### **Član 4**

*Za zadovoljavanje svojih ličnih i zajedničkih potreba, studenti su dužni da se brižljivo odnose prema imovini, da je namjenski koriste na način i po rasporedu koji utvrde organi upravljanja Univerziteta, da učestvuju i da sarađuju sa odgovornim zaposlenicima Centra u rješavanju pitanja značajnih za poboljšanje uslova života i rada u Centru.*

*Studenti se pod jednakim uslovima dobrovoljno uključuju u korištenje usluga i preuzimanja prava i dužnosti utvrđenih ovim Pravilnikom, a prestaju ih koristiti po svojoj volji ili na način regulisan ovim Pravilnikom.*

## **Član 5**

*U održavanju reda i čistoće, kao i o namjenskom korištenju prostora, inventara i uređenju brinu se studenti i zaposlenici Centra. Organizacija života i rada u Centru provodi se tako da se u tom zajedničkom, posebne vrste, domaćinstvu niko ne može ograničavati u pravima i dužnostima, osim u slučajevima kada pojedinac ili grupa svojim radom i ponašanjem ograničava prava i dužnosti studenata i zaposlenika Centra.*

## **Član 6**

*Prostorije za stanovanje sa svim inventarom i uređajima (soba za spavanje, hodnik, kupatilo i wc) i prostorije i uređaji za stručni, društveni, kulturno – zabavni i sportsko – rekreacioni rad studenata (čitaonica, klub, mliječni restoran, mesdžid, čajne kuhinje, hodnici, hol, stepeništa, i dr.), koriste se prema utvrđenoj namjeni, imajući stalno u vidu da pri tome ne dolazi do njihovog kvara, oštećenja ili uništenja.*

*Prostorije i uređaji za zajedničku upotrebu poslije korištenja i svakog kvara, oštećenja ili uništenja, moraju se dovesti u upotrebljivo i ispravno stanje, radi odvijanja normalnog života i rada u Centru.*

*Prostorije za zadovoljavanje zajedničkih potreba ne mogu se koristiti za stanovanje, niti se njihova namjena može mijenjati bez odluke Upravnog odbora Univerziteta.*

## **POSEBNE ODREDBE**

### **1. USELJENJE U OJ STUDENTSKI CENTAR ZENICA**

## **Član 7**

*Studenti se useljavaju u Centar na osnovu Ugovora zaključenog sa Centrom i po rasporedu utvrđenom u spisak primljenih studenata, koga se moraju pridržavati odgovorni zaposlenici Centra.*

## **Član 8**

*Prilikom useljenja u Centar, student je dužan da preda odgovarajućim zaposlenicima Centra:*

- potvrdu o izvršenoj uplati usluga za tekući mjesec,
- ljekarsko uvjerenje čiji datum izdavanja nije stariji od šest mjeseci,
- izjavu o preuzimanju duga ovjerenu od nadležnog Općinskim organa (Garancija).

*Na zahtjev odgovornih zaposlenika Centra, student je dužan besplatno se uslikati u upravi Centra, dati na uvid ličnu kartu i upisnicu "Indeks", radi utvrđivanja identiteta.*

## **Član 9**

*Odgovorni zaposlenici Centra dužni su da osiguraju najbrži mogući smještaj studenata pridržavajući se utvrđenog rasporeda.*

*Predaja posteljine, inventara i uređaja na korištenje vrši se na osnovu reversa, koji potpisuju student i odgovorni zaposlenik ili članovi komisije.*

*Odgovorni zaposlenik dužan je da upozna studenta koji se prvi put useljava u Centar sa načinom funkcionisanja uređaja u sobi i prostorijama koje služe za zajedničko korištenje.*

*Nakon provedenog postupka iz predhodnih stavova, smatra se da je student otpočeo koristiti usluge i od tog momenta ima prava, dužnosti i odgovornosti utvrđene Zakonom, Pravilima i Pravilnicima Univerziteta u Zenici i ovim Pravilnikom.*

## **Član 10**

*Useljenje u Centar počinje 15 septembra. U slučaju da se ne popune slobodni kapaciteti smještaja u Centru prema utvrđenom spisku primljenih studenata po sprovedenom konkursu/natječaju, odgovorni zaposlenik Centra dužan je da o slobodnim mjestima obavijesti direktora Centra.*

*Useljenje u Centar vrši se prema rasporedu studenata koji sastavlja Komisija za raspored soba za studente.*

## **Član 11**

*Student koji iseljava iz Centra mora se predhodno razdužiti imovinom, inventarom i ostalim zaduženjima prema reversu zaduženja koje je primio prilikom useljenja u Centar kod odgovornog zaposlenika u Centru.*

*O primpredaji posteljine, inventara i drugog potpisuje se revers. Ukoliko se prilikom primopredaje utvrdi da je posteljina, inventar, uređaj ili nešto drugo sa kojim je student bio zadužen, oštećen ili je nestao, u revers se unosi rok u kojem student treba da nadoknadi štetu.*

*Procjenu štete vrši Komisija za procjenu štete, razduženja i zaduženja studenata koju bira direktor Centra. Sve dok se šteta ne izmiri odgovorni zaposlenik Centra dužan je da zadrži izjavu o preuzimanju duga koju je student predao prilikom useljenja u Centar, radi obezbjeđenja potraživanja.*

## **Član 12**

*Iseljenjem iz Centra prestaju prava i dužnosti studenata utvrđena ovim Pravilnikom, ukoliko nije posebnim aktom drugačije određeno.*

## **Član 13**

*Prilikom iseljenja iz Centra student plaća stanarinu za cijeli tekući mjesec, ako se iseljava u drugoj polovini mjeseca, odnosno polovinu mjesečne stanarine ako se iseljava u prvoj polovini tekućeg mjeseca, o čemu unaprijed mora obavijestiti odgovornog zaposlenika u Centru, najmanje 15 dana prije iseljenja.*

#### **Član 14**

*Svi studenti koji su useljeni u Centar iseljavaju se i prestaju koristiti usluge Centra u roku koji je određen Ugovorom. Za studente koji u toku jula, avgusta i septembra imaju obaveze na fakultetu, Upravni odbor Univerziteta može donijeti odluku o visini recepcijskih cijena.*

#### **Član 15**

*Student koji diplomira ili se ispiše iz visokoškolske organizacije u toku školske godine, dužan je da se iseli iz Centra u roku od 15 dana od dana diplomiranja ili ispisivanja.*

#### **Član 16**

*Odgovorni zaposlenici Centra dužni su da vode raspored studenata po sobama na spratovima i međuspratovima.*

## **2. PRAVA I DUŽNOSTI STUDENATA**

#### **Član 17**

*Studenti stanari Centra imaju prava utvrđena Zakonom, Pravilima i Pravilnicima Univerziteta i ugovorom zaključenim sa Centrom, a naročito:*

- 1. da neometano koriste prostorije, inventar i druge uređaje u Centru radi zadovoljavanja ličnih i zajedničkih potreba,*
- 2. da učestvuju u vršenju djelatnosti Centra u skladu sa Pravilima i Pravilnicima Univerziteta,*
- 3. da učestvuju u radu Centra u skladu sa Zakonom, Pravilima i Pravilnicima Univerziteta,*
- 4. da zahtjevaju pravovremeno otklanjanje svih kvarova na uređajima i oštećenja u stambenim i zajedničkim prostorijama koji im otežavaju korištenje usluga,*
- 5. da zahtjevaju da se osigura rad i čistoća u Centru, kako bi se život i rad odvijao u odgovarajućim higijenskim uslovima,*
- 6. da koriste prostorije namjenjene za stručni rad, za društvene i sportske aktivnosti u skladu sa utvrđenim rasporedom koji utvrde upravni organi Univerziteta,*
- 7. da poštuju lično dostojanstvo i čast svih zaposlenika Centra i studenata – stanara, da zahtjevaju da svi zaposlenici Centra i studenti – stanari Centra poštuju njihovo dostojanstvo i čast i da im omoguće neometano korištenje prava koje ima u Centru,*
- 8. da daju prijedloge za unapređenje rada u Centru i za stvaranje boljih uslova za život i rad studenata u prostorijama koje koriste prema postojećim mogućnostima,*
- 9. da zahtjevaju propisno zagrijavanje prostorija namjenjenih za stanovanje, učenje i društveni rad u vremenu predviđenom u Ugovoru,*
- 10. da tri dana u toku sedmice koriste toplu vodu u ljetnom i zimskom periodu. Uključivanje bojlera za zagrijavanje vode vrše portiri u vrijeme jeftine struje.*
- 11. da zahtjevaju naknadu štete koju pretrpe krivicom zaposlenika Centra i studenata – stanara Centra u vezi sa korištenjem usluga na koje su ugovorom stekli pravo,*
- 12. da traže da im se posteljina obavezno mijanje dva puta mjesečno,*

13. da primaju kod sebe na prenoćište, bez naknade, članove uže porodice (majku, oca, brata i sestru a u izuzetnim slučajevima i druge kategorije gostiju) tri dana u toku mjeseca na osnovu identifikacije ličnih dokumenata uz predhodno odobrenje uprave Centra,
14. da koriste zajedničke prostorije (čitaonicu, čajne kuhinje i druge zajedničke prostorije) prema rasporedu koje utvrdi uprava Centra.

### **Član 18**

Studenti imaju slijedeće dužnosti:

1. da redovno plaćaju Ugovorom utvrđenu cijenu usluga za smještaj i ishranu u Centru do 5-og u mjesecu za tekući mjesec,
2. da brižljivo čuvaju imovinu za koju su zaduženi i da je koriste prema utvrđenoj namjeni,
3. da bez odlaganja prijave svaki kvar, oštećenje ili nestanak imovine, inventara i uređaja i unesu u knjigu kvarova na recepciji,
4. da održavaju red i čistoću u prostorijama u kojim stanuju i da vode računa o higijeni zajedničkih prostorija, odnosno da smeće bacaju u smetljarnike i korpe za smeće,
5. da prijave nestanak imovine,
6. da učestvuju u otklanjanju opšte opasnosti za zdravlje i život stanara Centra,
7. da učestvuju u radu studentskih organizacija i u komisijama OJ Studentski centar Zenica u skladu sa *Pravilima i Pravilnicima Univerziteta*,
8. da se uzdržavaju od svega što uznemirava druge stanare ili remeti red mir i čistoću u Centru,
9. da prije izlaska iz Centra zatvore slavine za vodu, ugase svijetla i zatvore prozore,
10. da se pridržavaju mjera protiv požarne zaštite i da lično učestvuju u sprječavanju ili otklanjanju elementarnih nepogoda i njihovih posljedica,
11. da prije spavanja ugase svijetla i zatvore slavine za vodu u sobama za spavanje, a poželjno bi bilo i u zajedničkim prostorijama,
12. da svakodnevno štede vodu i struju u stambenim i zajedničkim prostorijama i da te troškove svedu u normalne okvire trošenja,
13. da prilikom iseljenja iz Centra predaju sobu u čistom i ispravnom stanju.

### **Član 19**

Studenti – stanari Centra mogu primiti posjete od 8 do 23 sata. Lica koja dolaze u posjetu dužna su da na recepciji ostave ličnu kartu, indeks, pasoš i slično i da najave u koju sobu i kod kojeg studenta – stanara Centra dolaze u posjetu.

Lična dokumenta se zadržavaju na recepciji za sve vrijeme, dok se lice nalazi u posjeti.

### **Član 20**

Studenti – stanari Centra koji prime posjetu odgovorni su za narušavanje reda i mira koji bi eventualno mogao da izazove posjetilac. Posjetilac se može udaljiti iz Centra ako ometa normalan rad, red i mir u Centru i ako uništava imovinu Centra.

Direktor Centra donosi rješenje o zabrani posjete Centru (udaljavanje iz Centra) posjetiocima iz predhodnog stava.

## **Član 21**

*Studenti su dužni da odmah prijave svaki slučaj težeg oboljenja ili najmanji znak sumnje za zarazno oboljenje studenata – stanara Centra ili posjetilaca Centra.*

*Prijavu iz predhodnog stava podnose direktoru Centra ili zamjeniku direktora. Na zahtjev odgovornog zaposlenika Centra, student je dužan da se odmah podvrgne liječenju, a posjetilac da se odmah udalji iz Centra.*

*Odgovorni zaposlenik Centra dužan je da o svim slučajevima iz stava 1 ovog člana obavijesti Zavod za zdravstvenu zaštitu, odnosno odgovarajuću zdravstvenu ustanovu.*

## **Član 22**

*Kada postoji opravdana opasnost za zdravlje i sigurnost studenata, zaposlenika i imovine Centra, studenti su dužni da o tome odmah obavijeste odgovorne zaposlenike Centra i odgovarajuće službe u gradu (vatrogasnu službu, službu za hitnu pomoć, organe javnog reda i mira i dr.) i lično učestvuju u otklanjanju nastale opasnosti.*

### **3. ODGOVORNOSTI STUDENATA:**

## **Član 23**

*Studenti – stanari Centra odgovaraju po Zakonu, po odredbama Pravilima i Pravilnicima Univerziteta i ovog Pravilnika za povrede unutrašnjeg reda, ometanja normalnog života i rada i štetu koju prouzrokuju Centru ili drugim korisnicima usluga.*

## **Član 24**

*Za počinjenu materijalnu štetu studenti odgovaraju po načelima građanskog prava. Ukoliko postoji opravdana sumnja da je student prouzrokovao štetu Centru, komisija za procjenu šteta vrši opis oštećenih stvari i procjenu štete. Ukoliko se ne zna počinitelj, štetu ravnomjerno snose cimeri. Zapisnik o popisu oštećenih stvari i o procjeni štete dostavlja se bez odlaganja stručnoj službi Centra na dalji postupak.*

## **Član 25**

*Studenti – stanari Centra odgovaraju za počinjenu štetu na objektu Centra koji koriste zajedničke prostorije u kojim je šteta učinjena, obeštećuju uništene stvari Centru, nadoknađuju podjednako svi korisnici zajedničkih prostorija.*

*Komisija za popis oštećenih stvari i procjenu štete će zapisnički ustanoviti visinu štete u zajedničkim prostorijama i konstatovati na koji dio studenata – stanara Centra se odnose zajedničke prostorije u kojim je šteta počinjena.*

## **Član 26**

*Počinitelj/oci štete je dužan/ni da nadoknadi/e počinjenu štetu u roku od 8 dana. Ukoliko u tom roku ne izmiri štetu, naplata će se vršiti putem utuživanja pojedinca/aca.*

*Ukoliko je student namjerno učinio štetu, u zapisnik se unosi stvarna vrijednost oštećenih stvari, koju je dužan da nadoknadi. Ako se utvrdi da je šteta počinjena nepažnjom (iz nehata), student će za istu izvršiti nadoknadu prema knjigovodstvenoj vrijednosti stvari, inventara i uređaja.*

## **Član 27**

*Studenti odgovaraju disciplinski za najteže, teške i lakše povrede discipline i to:*

- 1. unošenje u prostorije Centra eksplozivnog materijala, lako zapaljivog materijala, materijala sa jakim i neprijatnim mirisom i vatrenog i hladnog oružja,*
- 2. izazivanje nacionalne, rasne i vjerske mržnje kao i druga ponašanja koja vrijeđaju čast i dostojanstvo studenta, zaposlenika, posjetilaca i drugih lica,*
- 3. vršenje radnji koje predstavljaju krivično djelo ili teže prekršaje protiv života i tijela, sigurnosti studenata i zaposlenika, imovine i društvenih dobara,*
- 4. ne podmirenje obaveza za smještaj u roku predviđenom u ugovoru za smještaj,*
- 5. namjerno oštećenje imovine Centra i imovine studenata – stanara Centra i zaposlenika Centra,*
- 6. bacanje i razbijanje flaša i drugih predmeta sa prozora i balkona Centra, bacanje i razbijanje flaša i drugih staklenih predmeta u stambenim i zajedničkim prostorijama, razbijanje staklenih površina u sobama, hodnicima, holu, čajnim kuhinjama i drugim zajedničkim površinama,*
- 7. opijanje, drogiranje ili kockanje u stambenim i zajedničkim prostorijama, igranje karata u TV sali i drugim zajedničkim prostorijama,*
- 8. primanje na prenočište stranih lica (ilegalaca),*
- 9. vršenje radnji koje narušavaju ugled Centra i estetski izgled Centra. Nepridržavanje higijenskih i zaštitinih mjera usljed čega može nastati opasnost za zdravlje i život studenata,*
- 10. ometanje rada studenata i zaposlenika,*
- 11. podsticanje na nered, učestvovanje u neredima kojim se ometa rad Centra, izazivanje tuče i učestvovanje u tuči u prostorijama i krugu Centra i dovođenje u opasnost sigurnost studenata, zaposlenika i imovine,*
- 12. raspiravanje netrpeljivosti između studenata i zaposlenika,*
- 13. stvaranje buke u prostorijama za stanovanje i zajednički rad: sviranje, pjevanje, slušanjem radio aparata ili tranzistora, upotrebom sredstava (zvučnika) koji proizvode jači zvuk, opijanjem, drogiranjem, izazivanjem, vrijeđanjem, ličnim obračunom i uništavanjem imovine,*
- 14. ometanje drugih da normalno koriste usluge smještaja i ishrane,*
- 15. smetanje studenata da koriste objekte za fizičku rekreaciju, kulturno – zabavni život i druge aktivnosti studenata,*
- 16. bacanje u lavaboe, wc šolje i druge sanitarne uređaje koji su povezani sa instalacijama za odvođenje otpadnih voda, otpadaka i predmeta kojim bi se mogla zapušiti ili oštetiti instalacija ili ugroziti životna okolina,*
- 17. upotrebljavanje grijalica i rešoa u sobama i trošenje prekomjerne količine struje i vode,*
- 18. mijenjanje soba bez saglasnosti odgovornog zaposlenika Centra,*
- 19. neplaćanje štete u roku od 8 dana, koja je komisijski procjenjena i utvđena zapisnikom o popisu oštećenih stvari,*
- 20. neodržavanje reda i čistoće u prostorijama u kojim stanuju i bacanjem smeća u zajedničke prostorije mimo smetljarnika korpa za smeće,*
- 21. lijepljenje postera i bilo kakvih slika na zidove, dijelova zgrade i inventara stambenih i zajedničkih prostorija što narušava estetski izgled prostorija i inventara,*
- 22. lijepljenje plakata i drugih saopštenja na oglasnoj ploči, hodnicima, holu, stepeništima, vratima, i drugim dijelovima zgrade i inventara bez odobrenja direktora ili zamjenika direktora Centra,*



23. lijepljenje postera, naljepnica i bilo kakvih slika na zidove, dijelova zgrade i inventara stambenih i zajedničkih prostorija što narušava estetski izgled prostorija i inventara, a vrijeđa ličnost i dostojanstvo čovjeka,
24. prenošenje inventara i opreme iz zajedničkih prostorija u sobe za stanovanje bez odobrenja direktora ili zamjenika direktora Centra,
25. narušavanje reda i mira u Centru i oko Centra poslije 23 sata u ljetnom periodu i 22 sata u zimskom periodu,
26. oštećenje sadnica, kidanje cvijeća i uništenje travnjaka u Centru i krugu Centra,
27. i druge radnje koje ometaju normalan red i mir u Centru i oko Centra.

### **Član 28**

*Ako postoji osnovana sumnja, da je student – stanar Centra učinio najtežu povredu svojih dužnosti utvrđenih u članu 27 ovog Pravilnika, direktor Centra može ga privremeno udaljiti iz Centra, dok se ne okonča disciplinski postupak.*

*U slučaju da je student – stanar Centra učinio krivično djelo koje mu se može staviti na teret, direktor Centra dužan je da istog trajno udalji iz Centra, obavijesti nadležnu službu MUP i visokoškolsku organizaciju na koju je upisan i roditelje studenta.*

### **Član 29**

*Za povrede dužnosti studenti – stanari Centra odgovaraju pred disciplinskom komisijom koja broji 4 člana i predsjednika, tj. 3 člana iz reda studenata – stanara i 2 člana iz reda zaposlenika Centra.. Odluku o izboru komisije donosi direktor Centra.*

### **Član 30**

*Za povrede discipline studentima – stanarima Centra mogu se izreći slijedeće disciplinske mjere:*

- za lakše povrede - opomena,
- za teže povrede - javna opomena i opomena pred isključenja,
- za najteže povrede - isključenje iz Centra sa zabranom posjete Centru.

*Stepen povrede utvrđuje disciplinska komisija u zavisnosti od svih konkretnih okolnosti koje mogu da budu olakšavajuće i otežavajuće.*

### **Član 31**

*Studenti – stanari imaju pravo žalbe na odluku disciplinske komisije Upravnom odboru Univerziteta u roku od 8 dana od dana donošenja disciplinske odluke.*

### **Član 32**

*Autentično tumačenje odredaba ovog Pravilnika daje Upravni odbor "JU UNIVERZITET U ZENICI".*

**Član 33**

*Ovaj Pravilnik stupa na snagu danom donošenja.*

**UNIVERZITET U ZENICI**

**Broj:01-101-301-0546/07-6  
Zenica, 12.06.2007. godine**

**PREDSJEDNIK UPRAVNOG  
ODBORA UNIVERZITETA**

---

**Prof. dr. sc. Kemal Subašić, s.r.**